

La Lettre Jèrriaise pour Sanm'di lé 19 dé Mar 2022.

Bouanjour bouonnes gens. Ch'est Françouais L' Maistre tch'a l'pliaisi dé vouos presenter la Lettre Jèrriaise à matîn, lé 19 du mais d'Mar 2022. Pour les dreinnes trais s'maines, nous a ouï qu'les nouvelles dé la dgèrre en Ukrannie et toutes les souffrances atroces qué chu pays là est a subithe. Ch'est vraiment tèrribl'ye qué nouos n'peut pon faithe grand' chose pour améliorer l's affairthes pour lus aidgi contre les siens tchi l's ont attatchis. I'n'y a pon d' doute qué les Ukranien ont des tchoeux d'tigres contre les Russes, mais tchi destruction et donmage tchi sont a faithe dans chu bieu pays!

J'm'en rappelle bein qué quand j'tions otchupés par les Allemands, la pliûpart des soudards 'taient bein polis. I' pathait qué les Russes n' ont pon autchun pitchi pour les paysans du pays et sont a tither sus des vouaituthes tchi sont a éprouver dé lus êcapper dé la dgèrre. Comme bein d'nous, j'n'avais jamais penser dé r'vaie des dgèrres dans nouot' vie. Ch'est eune catastrophe!

Mais, comment qu'ous êtes tous? À ch't heu qué lé pandémie c'menche a dînminnuer, nous a un p'tit mio dé temps pour vaie ses anmîns et la fanmil'ye. Chutte semaine pour mé, ch'est un vraie bonheu dé pouver vaie et rencontrer ma fil'ye, Hélène, pour la preunmié fais dans trais ans à cause du pandémie! Oulle arrivit Mècredi l'arlévée, et ch'tait un grand pliaîsi dé pouver l' atchilyi à l' aéroport et dé l'am'ner siez san fréthe, Charlot, où'est qu'ou s'en va rester pour la s'maine. Et pis, Jeudi j'feunmes siez Colleen's à La Grève dé Lé pour un fricot dé païsson et du bieu solé à côté d'la mé! J'sommes si chanceux dé d'meuther dans chutte belle petite île dé Jèrri aue la mé toute à l'entou d'nous.

À ch't heu, j'ai deux annonce pour vous aniet. Preunmiéthment, la s'maine tchi veint, j'avons l'Eisteddfod à la Salle Pârrouaïssial dé St. Ou. et nouos a 'té d'mandaient d'arriver en bouan temps, pa'ce qu' l' y'a

un tas d'entrées pour l'arlevée. Ch'est Sanm'di lé 26 d'Mar et nou m'a dit qué les portes, i' s'sont ouvèrtes devant deux heuthes.

Et pis, nou' m'a d'mandé étout dé vouos ramémouaither qué ch'est lé Dîner Annuel dé L'Assemblée d'Jèrriais, Dînmanche lé trais d'Avri à l'Hôtel Ambassadeur, 12.30 pour s'assiéthe à eune heuthe, s.v.p. Lé prix des billets pour lé dîner est £25 et i' faut rêsèrver vouotre billet auve Maureen ou Winston Lé Brun au tout vite possibl'ye, s.v.p. Lus numétho dé telephone est 739341.

Eh bein, n'en v'la assez pour aniet. J'espéthe dé vouos vaie qué s'sait à L'Eisteddfod ou au Dîner Annuel dé L'Assemblée. À bi et ayiz tous eune bouonne sémaine.